

Sudas Sesus tuktsa bo ziwatahaka

Sudas Sesus tukytsa, Tsiaku tsy. Sesus tuktsa hi ziwatahaka, iwaze nisispirikpoko. Sihyrinymyrytsa wasanibara ty nisihrinymyryky ana humo hi — pykyhytutaha sibo batu yh̄y tsimaha — niy. Deus Sudas ziapepepyky iwatahi Deus harere ziwatahaka. Aba katsa kino niwatihi ana hi tanymyryky.

¹Uta Sudas. Sesus Kiristu tsumuēh̄itsa. Tsiaku tsy. Ikiachatsa bo piwatahaka. Deus hi zahawatawy. Deus myzo babata. Atahi ahahumo tsimypokzitsiarēta. Sesus Kiristu ahahumo tsimypokzitsiukrēta. Pahapokzitsiki.

²Uta Deus bo ahatsyhyryze mopamykysoko:

— O myzo ahyrytsa humo amypokzitsihukta. Batu paikpa mytsaty mykaranaha. Ahumo sakurētsa. Botu sihumo tsimypokzitsiukrēta. Tysipokzitsitohikta — mykara.

Iwa Deus bo ahatsyhyryze mopamykysoikik.

Deus soho humo mymyspihikbatakanahatsa.

³Kaharereziuwyttsa mytsaty ikykara:

— Abaka katukytsa bo piwatahaka. Sesus Kiristu tazo bo mymyoktyhyryk. Mymysapybyitsa tsikykaranaha Sesus humo mekywa tu tsmoziknaha, anahi tawatahaka iwatatu batu. Tapara Sesus tahyrinymyrywy ty nimyspirikpoko. Anahyrinymyrywy papeu humo pykyhytu ziwatahaka ana ty hi piwatahakazo. Anaspirikpowy humo ka ja spiriktsokda spiriktsokda byijataha ana humo hi tsimyspirikponaha — mykara.

⁴Kytsa Sesus humo sispirikpobyitsa ahapapatu izumunaha. Siharere meky watu. Asaktsa:

— Deus isapyha ty mybo nyny my. Iwatatu zeka tsipisapybyikinaha Deus tisapyrēna ty mybo nyny mykara. Mymysapybyitsa tsimykaranaha zeka myhumo ba ziky — mybarapetu mykaranaha. Sesus Kiristu ahapehatsa babata. Sesus Kiristu batu sipehatsa iharere bo batu yh̄y mykaranaha. Siharere meky watu. Deus bo batu yh̄y mykaranaha. Tubabatu Deus sisoho mybo nitsasoko.

— Iske myparawy watsa iwaze kytsa sihumo pimiyikinaha — niy. Siharere humo Deus ispe niy:

— Ikiahatsa batu wasani tsimykaranaha iwaze sinini ykarawy bo pahapehahik — niy.

⁵O kytsa mytsaty tynakaranahaktsa! Tubabatu Deus Isareu tsekokatsa Esito bara botu nisioktyhyryk. Deus humo sispirikpo byitsahi nisibabaik. Ana humo ka botu ahahyrinymyrētsa, kaokzeka anasoho bo hi mytsatyziu tsimaha zeka wasani tsimaha.

⁶Wastuhu bijoikpe ezektsa soho bo mytsaty tsimykaranaha! Asahi simysapybyitsa nikaranaha, Deus harere bo batu yhy nikaranaha. Iwatahi sinini ykarawy bo nisipehahik. Sinini ykarawy miwa anaeze mynapykyryknaha ba zikziponaha. Sesus Kiristu myziksizoze sinini tohi maha. Anasoho bo mytsatyziu tynakaranahaktsa!

⁷Iwaze hi Sodoma, Komora eze zikzurukunahatsa iwaze ustsia siututsa pauksitsa ahatsa ana ezektsa sisoho bo hi mytsatytaha. Sihudikhudikwy ezektsa makutsa tu naharapewowohikiknaha. Tapara wastuhu bijoikpe iknyktsa iwa ziknakaranahatsa iwatahi Deus sinini ykarawy bo nisipehahik. Anaeze izo zuba eze mynaharakorokonaha tawahi ba zikbe, anaeze tahawahi sinini mynakaranaha. Anahumo Deus mybo nitsasoko ana soho bo hi mytsatyziu tynakaranahaktsa!

⁸Asaktsa sispirikpobyitsa ahabo izumunaha. Simysapybyitsa tu mykaranaha. Sitsotuspykrēnikitsa watsa iwaze hawa ha ty imysapybara ty mymyhyrinymyryknaha. Deus humo sispirikpobyitsa asa zuba siakparawy, Deus harere soho pisapybyikinaha. Iharere bo batu ma zikaha. Bijoikpe ezektsa Deus tsumuēhītsa mysisapybyirikinaha.

⁹Bijoikpe ezekta Mikeu inarokotakta niwa ahata. Atahi taparakta bijoikpe ezektsa Deus tsumuēhītsa. Hyrikoso sapybara pehakatsa Satanas ituk nipamykysokoze, ipe niy:

— Aty sa nihyrikosokdata Moises nury nitsahorok — niy. Ana humo kino niharapepehakanahaze Mikeu tihi:

— Utakta ba zabetsak Deus zuba ape my. Abo awatutykta, Deus zuba pabetsak — niy. Hyrikoso sapybara pehakatsa Moises nury humo Mikeu kino batu tyso. ¹⁰Asahi ahabo zumunaha Deus harere humo sispirikpobyitsa sihyrinymyrybyitsa hi pimiyikiknaha. Sihyrinymyrybyitsa hi mopyknaha, asaktsa siraratsa watsa taha bo zuba mytsaty mykaranaha. ¹¹Asaktsa sinini mykaranaha. Simysapybyitsa tu mykaranaha ana humo hi sinini mykaranaha. Niwahi Deus mozihikik.

Asaktsa Kaĩ watsa sizokdirētsa mozurukunaha ana humo hi sinini mykaranaha.

Asaktsa Barão watsa. Atahi okryrsaro zuba iakparawy iwatsahi imysapyrēnikia siakparawy ana humo pimiyikinaha Barão watsa.

Asaktsa Korã watsa Deus harere bo batu ma zikaha Korã watsa maha. Iwatahi Deus sisoho humo:

— Asaktsa batu simysapy mykaranaha — mykara. ¹²Asaktsa sisopyksapybyitsa ikiahatsa tuk mozumunahaze ioktsirõrõnikia watsa maha. Ikiahatsa ahadisahawy tsipahadisahanahaze Sesus ahasapyzekenihyrikosokda ana bo hi mytsaty tsimykaranaha, asa kino ahatur ioktsirõrõnikia watsa maha. Duabohotsa tsik tsipikunahaze Sesus ahasapyzekenihyrikosokda ana bo hi mytsaty tsimykaranaha, asaktsa taha bo zuba mytsaty mykaranaha. Sisikpybybyitsa tu asa zuba mytsaty mykaranaha. Utsa humo batu simypokzitsi.

Asahi bijo zatata watsa. Bijo zatata zuba hyritsik ba ziknawõ. Bijo zatata zopoktsa tuk mopaparakak zekywaha ba zikziksizo.

Iwaze asaktsa hwi watsa iharakawy pomoze ba ziktahara. Hwi haratatsa bobokhotsa watsa tahawahi mokbanaha.

¹³Asahi pihik iheridawy watsa. Pihik iheridawy humo itsiksoroporo nimirazata bo pipaparakze ky waha. Asahi sisikpybybyitsa simysapybyitsa tu mykaranaha kytsa okze tu mynakaranaha.

Asahi byrisoiktsa watsa. Byrisoiktsa nanabyitaba mynaukurunaha. Asa niwatihi paikpa mykaranaha. Asa kino pimiyikiknaha. Iwaze Deus sinini ykarawy bo mysipehahik. Anaeze miwahaeze zuba tahawahi mynapykyryknaha.

¹⁴⁻¹⁵Tubabatu Enoke sisoho nitsasoko. Asahi Deus humo sakparawybyitsa soho nitsasoko. Tapara nipupurukuknahaze botu sisoho nitsaso. Atakta Enoke Adão tsekoka. Adão tsekokatsa sizubarëtsa. Adão tsekokatsa sete nipupurukuknaha. Kyze Enoke zinaropykyk. Atakta simysapybyitsa soho nitsasoko. Tapara simysapybyikitsa nipupurukuknahaze sisoho tihi:

— O asahi Deus humo batu siakparawy. Sisikpybybyitsa tu Deus okze ka simysapybyitsa tu mykaranaha. Wasanibyitsa mykaranaha. Isapybaraty mykaranaha. Deus harere bo batu hỹ zikaha. Iwatahi mypehakatsa bijoikpe ezektsa tatsumuëhĩtsitsa tuk mozumu. Mypehakatsa sizubarëtsa tuk mozumunaha. Myzumuze mypehakatsa ihumo simysapybyitsa mykaranaha ispe:

“Ikiahatsa katuk zeky batu ahamysapy” my. Iwa Deus sinini ykarawy bo mysipehahik — Enoke niy. Tubabatu iwa Enoke sisoho nitsasoko.

¹⁶Asaktsa sisopyksapybyitsa taha humo tu tahakyrikinaha iwatahi pimiyikiknaha. Taha bo zuba mytsaty mynakaranaha. Utsa kytsa soho humo mysisapybyrikinaha. Asa zuba mopamykysokonaha:

— O katsaktsa mysapyrëtsa — mybarapetu mykaranaha. Simysapybyitsa tu utsa pe maha:

— Ikiahatsa wasani tsimaha — mybarapetu mykaranaha. Iwa mopamykysonahaze utsa namy piakse tsihikiknaha. Iwa simysapybyitsa mykaranaha.

Asahi Sesus humo sispirikpoziubyitsa soho pykyhytutahaktsa.

¹⁷⁻¹⁸ Ikiahatsa kaharereziuwytza mytsatzyiu tynakaranahaktsa! Nawa ha ty Sesus Kiristu ykzohotsa botu ahabo nitsasokonaha ana bo hi mytsaty tsimykarana. Ahape nikarana.

— Aibani mybarawy mopykze kytsa ahabo mozumunahaze pahasopykziubyikinaha Deus sakparawybyitsa pahamyijakanaha zuba. Tahahumo zihikaty zuba mynakarana ana bo zuba mytsaty mynakarana.

¹⁹ Simysapybyitsa Sesus tuktsa metutu tahasapy tshikiknaha. Sesus tuktsa siharewabybybararëtsa moziknaha ana hi mozihikiknaha. Deus hyrikoso situkbyitsa mynapykyryk. Hawa ha mozihikiknaha ana humo hi zuba mynakarana.

²⁰ O kaharereziuwytza botu Sesus humo ahaspirikporëtsa hÿ. Ihumo tspirikpotohinahaktsa ahamysapyrëtsa tsimoziknaha. Deus bo typamykysoikiknahaktsa! Deus zikwy humo ibo tupamykysoikiknaha.

²¹ Deus ahahumo tsimpokzitsiarëta ana humo hi tsikspirikpokonaha. Deus ahahumo tsimpokzitsiukrëta ana humo hi ahaspirikporëtsa! Sesus Kiristu tazo bo pahaoktyhyryk. Ahawahi izo tuk tsinapykyryknaha. Ana hi taperyky — my.

²² Wastuhutsa:

— Sesus humo kaspirikporëta zeka kamysapybyita ikykara zeka piokzohik. Batu kanyhy — maha. Asa bo hi Deus wasania ty tsimytsasoziukunaha. ²³ Utsa simysapybyitsa tysitsumuëhîna. Aty izo bo mynautsok zeka tyzezonaha. Anawaze simysapybyitsa tysitsumuëhîna niharakorobaik tawata. Wastuhutsa simysapybyitsa tu nikarana batu sisikpyby. Iwatsatu tysisapywykynaha. Sihumo ahamypokzitsirëtsa. Pykyhytutaha! Hawa nikarana batu ahakparawy ba ahasopyk watu ba zikaha! Simysapybyitsa mykarana iwatsahi siwabyitsa!

Deus bo tysakibazikiknahaktsa.

²⁴ O Deus zuba abazubata my. Atahi mynamykuwyky iwaze imysapybara ty tsmoewynaha. Sesus tazo bo mymyoktyhyryk iwaze Deus tuk mywahi tsimynapykyknaha. Iwaze wasani tsimaha. Katsaktsa mysapybyitsa tsikykarana atahi mymyokzohik ihumo meky watu tsimoziknaha. Mymysapyrëtsa. Deus tukze mywahi tsimynapykyknaha mykurëtsa. ²⁵ Katsa ape tsimaha:

— O Deus ikia zuba Deus babata. Batu aty tohi ikia wata, ikia zuba myzo babata. Ikia Sesus Kiristu tsipeha atahi abo mymyoktyhyryk. Ihumo myspirikporëtsa iwaze ikia bo mymyoktyhyryk.

O ikia zuba wasanita. Ikia tsamysapyrënikita. Azikwykyta ba hawa tohi zasukninaha.

O ikia zuba myhyrinymyrytsa babata. Ikia apunihikrēnikita. Aharere eze tu mybarawy tsikzukni nanabyitaba aharere. Tapara mybarawy tsikzuknize bijoikpe ezektasa atsumuēhĩtsitsa iwa nitsasokonaha abaka katsakta situk asoho humo tsimysakibazikiknaha. Mywahi atuk tsimynapykyryknaha iwa tsimykaranaha — tsimaha.

Iwa my hỹ. De. Niwazuba.

Sudas